

Prome taxista femenino di Aruba y Antias Hulandes reconoci



ORANJESTAD- Carmen Quant tabata e prome hende muhe cu a haya un permiso riba su propio nomber pa core taxi na Aruba y tambe e prome den henter Antias Hulandes.

Ayera minister Otmar Oduber a reconoce sra. Quant como Embahadora di Bon Boluntad di Aruba. “E ta un señora cu a habri e caminda pa futuro di hende muhe na nos isla y na e tempo ey Antias Hulandes pa un ofishi nobo”.

Sra. Quant a eherce e bunita ofishi aki durante mas di 40 aña, segun e minister, y despues di tanto aña sirbiendo nos comunidad y tambe nos bishitantenan, el a pasa e permiso over pa su yiu homber Herry Koolman.

Minister Oduber a bisa sra. Quant cu danki na e trabou grandi cu el a haci durante mas di 40 aña, hunto cu tur otro persona cu a eligi e ofishi di taxista, awe nos tin un turismo floreciente y ta sigui traha riba e base cu a wordo construi den pasado.

“Pa mi ta un honor awe, den

number di Gabinete Mike Eman II entrega e di dos reconocimiento den e ultimo 4 añanan como Embahadora di Bon Boluntad di Aruba. Como reconocimiento di amistad y fidelidad demonstra na nos isla, Gobierno di Aruba gustosamente ta reconoce aki Sra. Carmen Quant cu e titulo di Embahadora di Bon Boluntad di Pais Aruba”, e mandatario a duna di conoce. Comentando riba e anecdotanan scucha for di sra. Quant, minister Oduber a indica cu e por a comprende cu su inicio como taxista no tabata facil, e aceptacion di un hende muhe memey di puro hende homber no a bay sin oposicion. Nan tabata haci diferente cos pa molesti’e, pero awe por wak Sra. Carmen Quant como un ehempel pa e gran cantidad di taxista femenino, mirando cu ta Sra. Quant ta esun cu a kibra e ijs, e minister ta laga sa. Na final e mandatario tambe a haci entrega di algun regalito den forma di e diferente mercancia cu ta wordo uza pa mercadea Aruba □